



Terenga 3: Hōtaka 46 - Kōrero ā-waea

He Mihi

Whakapiri mai, whakatata mai ki te rangapū pīkoko o Ako. Huihuia mai rā ō tātou manako kia piki te kounga o te reo ki te karamata o te rangi.

Hei Mahi Whakarongo

Hei mahi whakarongo mā tātou i te rā nei, kua tōia mai taku hungawai, a Lewis Moeau, ki roto i te whare o Ako, kia uia ki te pātai. Ko te kaupapa kua tukuna hei kōrero māna, ko ngā tāpaetanga a te hunga whakatairanga i te reo i ngā tau o te whitu tekau, ki te aroaro o te kāwanatanga o taua wā, e mana nei te reo Māori ā mohoa nei. E te pāpā tēnā koe.

Ko te 25 tēnei o ngā tau kua noho te reo Māori hei reo whai mana ā-ture nei, i Aotearoa. Ko te 30 o ngā tau e tū ana te Kōhanga Reo.

Tēnā whakarongo ki ngā kōrero a Lewis me ngā pātai a ngā ākonga o Ako.

He Whakamārama

He rerekē te reo ā-waha i te reo ā-tuhi. I te wā e kōrerorero ana te tangata, he nui ngā whakarāpopototanga e taea ana, nā te mea e mārama pai ana ngā taha e rua ki te horopaki o te kōrero. I te rā nei ka aro atu ki ētehi rautaki whakawhitiwhiti kōrero hei whai māu mena e hiahia ana koe kia whakawhānuitia e te kaikōrero ana kōrero.

Mehemea e hiahia ana koe kia whakawhānuihia te kōrero, kia toaitia rānei te kōrero, anei ētehi pātai poto:

a wai?

te aha?

ki hea?

ko hea?

tokohia?

he aha nā?

Mehemea kua wareware i a koe te kupu, te ingoa rānei o tētehi tangata, me whakawhirinaki atu ki te kupu 'Mea':

I reira...a Mea! Ko wai rā te ingoa? Aiii! He taonga te wareware!

Aiii, he aha rā hoki te mea nā?

Kua wareware i a au te kupu, engari he pēnei te āhua...

Hei Mahi

Rangahaua te whanaketanga o te reo Māori i Aotearoa mai i te hainatanga o Te Tiriti o Waitangi i te tau 1840. Tuhiā mai he rārangi wā hei tohu i ngā mahi matua, i ngā hui matua, i ngā taturanga hoki e hāngai pū ana ki te whanaketanga o te reo Māori.

He Paetukutuku:

http://www.tetaurawhiri.govt.nz/english/issues_e/hist/index.shtml

<http://www.korero.maori.nz/forlearners/history/>